



UPI: 05-29-1-1046/20
Sarajevo, 15.12.2020. godine

Na osnovu člana 46. stav (3) tačka d) i 49. st. (1) i (2) Zakona o komunikacijama („Službeni glasnik BiH“, br. 31/03, 75/06, 32/10 i 98/12), a u vezi sa primjenom člana 16.16 stav (1) Izbornog zakona Bosne i Hercegovine („Službeni glasnik BiH“, br. 23/01, 7/02, 9/02, 20/02, 25/02, 4/04, 20/04, 25/05, 52/05, 65/05, 77/05, 11/06, 24/06, 32/07, 33/08, 37/08, 32/10, 18/13, 7/14 i 31/16), čl. 16., 17. i 25. Pravilnika o postupku rješavanja kršenja uslova dozvola i propisa Regulatorne agencije za komunikacije („Službeni glasnik BiH“, broj 18/05), te čl. 5., 9., 13. i 40. Pregleda povreda i kazni koje izriče Agencija („Službeni glasnik BiH“, broj 8/17), rješavajući po službenoj dužnosti, u postupku protiv Javnog poduzeća „Radio-Rama“ d.o.o. Prozor-Rama – Radio Rama, Kralja Tomislava bb, Prozor-Rama, radi utvrđivanja kršenja Izbornog zakona BiH, generalni direktor Regulatorne agencije za komunikacije donosi:

RJEŠENJE

1. Utvrđuje se da je Javno poduzeće „Radio-Rama“ d.o.o. Prozor-Rama – Radio Rama prekršilo čl. 16.3 i 16.4 Izbornog zakona Bosne i Hercegovine u okviru Poglavlja 16. *Mediji u izbornoj kampanji*.
2. Za utvrđeno kršenje iz tačke 1. dispozitiva ovog rješenja izriče se novčana kazna u iznosu od 3.000,00 KM (trihiljade konvertibilnih maraka).
3. Nalaže se Javnom poduzeću „Radio-Rama“ d.o.o. Prozor-Rama – Radio Rama da na ime učinjenog prekršaja plati novčanu kaznu od 3.000,00 KM (trihiljade konvertibilnih maraka) u roku od 15 dana od dana prijema rješenja, na račun Regulatorne agencije za komunikacije: 1610000033470055, kod Raiffeisen Bank dd Bosna i Hercegovina.
4. U slučaju nepostupanja po nalogu iz tačke 3. dispozitiva ovog rješenja, dužnik se obavezuje da povjeriocu, pored iznosa utvrđenog glavnog duga, isplati i zakonsku zateznu kamatu na iznos glavnog duga prema Zakonu o visini stope zatezne kamate, počev od dana izvršnosti ovog rješenja.
5. Nosiocu dozvole, Javnom poduzeću „Radio-Rama“ d.o.o. Prozor-Rama – Radio Rama, stavlja se na znanje da svako ponovljeno kršenje pravila i propisa Agencije može rezultirati izricanjem strožije sankcije.
6. Žalba ne odlaže izvršenje rješenja.

Obrazloženje

Regulatorna agencija za komunikacije (Agencija) je, inicirana prigovorom Opštinskog odbora HDZ BiH Rama, po službenoj dužnosti, zatražila snimke programa Javnog poduzeća „Radio-Rama“ d.o.o. Prozor-Rama – Radio Rama (Radio Rama) od 29.10.2020. godine, u okviru kojeg je emitovano gostovanje općinskog načelnika Joze Ivančevića, te izjašnjenje na navode iz prigovora u kojem se, između ostalog, kaže da je Radio Rama, *pod krinkom poziva političkim subjektima da se prijave za predstavljanje svojih političkih programa i kandidata, na perfidan i neprofesionalan način u program uključila aktuelnog načelnika Općine Jozu Ivančevića, koji je suprotno svim principima uravnoteženosti, poštenja i nepristrasnosti, govorio bez bilo kakvih vremenskih ograničenja niti jasne najave da se radi o plaćenju političkoj podršci, niti je isti taj vremenski okvir dat drugim političkim*

subjektima koji imaju kandidate u ovoj općini, čime su, prema mišljenju podnosioca prigovora, prekršene odredbe Izbornog zakona Bosne i Hercegovine (Izborni zakon BiH).

Radio Rama je u propisanom roku dostavila traženi snimak i izjašnjenje na navode iz prigovora u kojem se, između ostalog, kaže da je gostovanje načelnika Ivančevića upriličeno *povodom usvojenog Nacrta proračuna Općine Prozor-Rama i zakazane javne rasprave na isti, a ne nikako u sklopu nekakve političke kampanje*, kvalificirajući optužbe HDZ BiH Rama napadom na slobodu govora, na novinare i sam radio.

Analizom dostavljenog snimka konstatovano je da je u emisiji, ukupnog trajanja 25,5 minuta, gost Jozo Ivančević na samom početku predstavljen kao načelnik Općine Prozor-Rama, te je u nastavku bilo riječi o Nacrtu budžeta Općine, sredstvima za budžet, načinima na koje su ista osigurana, problemima u vezi s tim koje je načelnik uspješno savladavao, projektima koji su budžetom planirani, načelnikovim postignućima u vezi sa nekolicinom projekata namijenjenih različitim kategorijama stanovništva, itd. Razgovor o navedenom protekao je bez konkretnog spominjanja trenutne kandidature ili političke opcije kojoj načelnik Ivančević pripada. Međutim, u 18. minuti emisije voditelj usmjerava razgovor na aktuelnu izbornu kampanju:

Voditelj: Znamo za dosta projekata koji su završeni ili su pred završetkom. Imate li u planu nove projekte, jer ste se ponovno kandidirali za funkciju načelnika?

Ivančević: Da, evo kandidiran sam za novi mandat zajedno sa listom HDZ 1990 Općinskog vijeća. Svakako imamo u planu završetak pokrenutih projekata i pokretanje novih projekata, rekao bih. Jedan od većih će biti novi dječji vrtić, gdje je evo raspisan i natječaj ove godine. Mi ne znamo hoćemo li uspjeti započeti, što se kaže kamen temeljac staviti, ali dok se ova dokumentacija sva završi i vidi validnost dokumentacije, onda ćemo vidjeti kad početi sa izgradnjom dječjeg vrtića. Izgrađićemo i novu tržnicu, kompletirati sortirnicu sa kompostanom, novi pročistač otpadnih voda, krenuti sa uređajima poslovnih zone. Evo rekao bih, mislim da ćemo do nove godine otvoriti ovdje sortirnicu, kompostana će dogodine se kompletirati sa reciklažnim dvorištem i sa sortirnicom, tako da ćemo sigurno imati jedan lijep ekološki park. Znači, zatvara se ova Duška Kosa i sav otpad dolazi tu gdje je locirana ova sortirnica sa kompostanom. Što se tiče, evo rekao bih, izgrađivaće se dalje ovi i lokalni putevi i gradske ulice, znamo da nismo sve završili, ja znam da neki prigovaraju kako se asfalt daje u neka sela, mjesta, ali vjerujte oni ljudi koji nemaju asfalta pred svojim kućama, oni to znaju, onda oni to jednostavno i traže. Da oni ne traže, da ne dolaze zahtjevi prema Općini, vjerujte ne bi ni mi nekome na silu stavljali, ali znamo da je danas osnovni neki uvjet da čovjek ima vodu, da ima put, da ima rasvjetu, struju, je li, to su neki osnovni parametri ljudskog nekog življenja. Nastavićemo pozivati poduzetnike da otvaraju radna mjesta, tu je malo problem, jer nemamo baš razvijen poduzetnički taj neki duh, davati poticaje poduzetnicima, poljoprivrednicima, studentima, mladima. Trebamo poboljšati usluge u oblasti zdravstva, isto tako i školstva, kulture i sporta. Vjerujem da ćemo biti zajedno i u narednom mandatu, a važno je reći da projekte planiramo zajedno sa cijelim timom, pa i sa vijećnicima Općinskog vijeća, tako da će za njihovu uspješnost biti potrebna potpora što većeg broja vijećnika. Tako ako budemo evo u ovom mandatu dobili što više vijećnika, onda je lakši i rad načelniku i ostvarivanje ovih projekata, ciljeva što smo zacrtali i što ih planiramo završiti.

Voditelj: Da, vi ste aktualni načelnik. Ovo gostovanje nije kampanja. Spomenuću tek, imate i protukandidata za funkciju načelnika Općine. Možda vaš komentar, poziv na sučeljavanje, poruka?

Ivančević: Pa ovako, da, imam jasno protukandidata, imao sam na svakim dosadašnjim izborima, ovo je moj četvrti mandat, i u tome nema mislim ništa loše, je li. Loše će biti ako protukandidat, ako ga pripremaju za to da se odrekne ovih sredstava koja pripadaju Rami, to će biti najveći problem, drugo me ništa ne zabrinjava. Dovoljno je u jednom sudskom postupku napraviti propust i puno toga može otići u krivo. Znači, mogu se ova sredstva, sve što smo se mi kroz ovih 7-8 godina borili i što smo uspjeli donijeti novac ovdje u našu općinu, vjerujte sad svi kažu ima općina pare, ima, ali nije bilo jednostavno i lako suprotstaviti se centru, i Sarajevu i Mostaru, vjerujte evo da smo u tome uspjeli, ništa specijalno nismo imali, specijalne odvjetnike, samo smo tražili zakonsku regulativu i osnov. I hvala Bogu da je

sud uvidio da su općine u pravu i da imaju pravo da raspolažu...(...)... Upravo se u narednom razdoblju mogu okončati svi ti postupci i trajno učvrstiti općinski proračun, tako da bi općina jednostavno mogla imati svoj neki stabilan proračun, i imaćemo ga, tako da ćemo moći evo ove što smo pričali o ovim projektima uraditi. Jedan od razloga moje kandidature za načelnika je upravo to da ne dozvolim odricanje tih sredstava, znači da se ne odlijevaju, da ostanu tu kod nas. I mnogi misle da su ranije novci umjesto u Rami završavali u nekim promašenim projektima, k'o što i ja mislim, ili su se gradile dvorane u drugim centrima, oli Sarajevu, oli Mostaru. Kako god, nećemo im dozvoliti niti da dođu u takvu priliku, znam da imamo potporu naroda na izborima, unatoč njihovim krivotvorenjima tuđe izborne volje, kojeg smo bili svjedoci, znajući šta su radili prošle izbore, na koji način su dolazili do povećanog broja vijećnika, da je to bila umjetna njihova i Vijeće ovo koje je funkcioniralo četiri godine. Imali su dosta manje vijećnika, znamo kako su ljude gore prijavljivali, mislim da se i sad, tek sad postupak vodi protiv nekih ljudi koji su to krivotvorili, vidjećemo kako će se to sve završiti. A ovo za sučeljavanje što ste rekli, evo rado, ja nemam ništa protiv, vi imate protokol, kad budete pozvali ja sam spreman doći i suočiti se sa protivnikom.

Voditelj: Do sučeljavanja ovdje ćemo staviti točku. Načelnice, jedna vaša poruka za kraj ovog gostovanja.

Ivančević: Pa rukovođenje općinom je jedan sigurno vrlo ozbiljan i odgovoran posao i njega mogu proći samo ljudi koji tu žive, a ne koji nam dolaze, je li, sa strane. Oni koji u ovu općinu dođu pred izbore, što kaže, zapale svijeću i vrata se, ne znam, oli Sarajevo, oli Mostar, i to su čak poslani od nekog drugog, ne mogu raditi jedan tako ozbiljan posao kao što je rukovođenje općine, jer to je neozbiljno. Ja sam rekao, evo živim ovdje s narodom svakodnevno i uvijek sam osjećao potporu, na čemu sam iskreno zahvalan. Vjerujem da naši sugrađani znaju pravilno prosuditi i da će ispravno odlučiti na ovim izborima. I svakako sam optimista, vjerujem u dobar rezultat HDZ 1990 i mene kao načelnika i većeg broja vijećnika sa liste za Općinsko vijeće Prozor-Rama. Mislim da evo to bi bila neka poruka, da se iziđe na izbore u što većem broju i da ljudi dadnu podršku. I meni i Vijeću.

Voditelj: Hvala vam što ste bili naš gost, čujemo se prvom novom prilikom. Poštovani slušatelji, moj gost bio je načelnik općine Prozor-Rama, dr. Jozo Ivančević. Hvala vam za pozornost i za slušanje.

Na osnovu navedenog, Agencija je došla do preliminarnog zaključka da je ovim došlo do mogućeg kršenja Izbornog zakona BiH, te je dopisom od 17.11.2020. godine zatražila od Radija Rama da se izjasni o mogućem kršenju čl. 16.3 i 16.4 Izbornog zakona BiH, u kojima se navodi:

Član 16.3

U emisijama elektronskih medija nijedan politički subjekt ne može imati povlašten položaj u odnosu prema drugom političkom subjektu.

Zvaničnici na svim nivoima vlasti koji su kandidati na izborima ne smiju imati povlašten položaj prema drugim učesnicima u izbornom procesu.

Informiranje o redovnim aktivnostima zvaničnika na svim nivoima vlasti dozvoljeno je u okviru informativnih programa elektronskih medija, bez navođenja njihove kandidature na izborima i stranačke pripadnosti, kad god se radi o aktivnostima koje proizilaze iz zakonom utvrđenog djelokruga organa kojima pripadaju.

Član 16.4

Elektronski mediji posebno će voditi računa o tome da se principi uravnoteženosti, poštenja i nepristrasnosti poštuju u informativnim emisijama, pogotovo u emisijama aktuelnih vijesti, zatim u intervjuima, te u raspravama o aktuelnim političkim temama, poput okrugh stolova i slično, koje

tematski nisu u direktnoj vezi s izbornim aktivnostima političkih subjekata, ali bi mogle imati uticaj na raspoloženje birača.

U izjašnjenju Radija Rama, zaprimljenom 23.11.2020. godine, između ostalog, navodi se sljedeće: "Što se tiče prigovora HDZ BiH Rama u svezi gostovanja Jozе Ivančevićа, načelnika općine Prozor-Rama, naglašavamo da je načelnik Ivančević (koji je bio kandidat za načelnika ispred općine Prozor-Rama ispred HDZ 1990) u našem programu gostovao isključivo u ulozi aktualnog načelnika obrazlažući građanima Nacrt proračuna općine Prozor-Rama i zakazane javne rasprave na isti, a ne u sklopu političke kampanje. Dužnost JP Radio Rama, kao i svakog drugog medija, je informiranje građana, pa i u predizborno vrijeme, stoga mi ne vidimo nikakvo kršenje zakona niti bilo čega drugoga što smo ugostili aktualnog načelnika po ovom pitanju. Ono što je predviđeno da se uradi proračunskim sredstvima, u slučaju ako je suprotno Izbornom zakonu nije suprotno transparentnosti trošenja proračuna, što je predviđeno člankom 5. Zakona o proračunu Federacije BiH. Projekti koji se spominju (izgradnja dječjeg vrtića, nova tržnica, sortirница sa kompostanom, izgradnja lokalnih puteva i gradskih ulica...) predviđeni su da se urade proračunskim sredstvima. Temeljem članaka 16.3 i 16.4 Izbornog zakona koji ste naveli kao prekršene, JP Radio Rama navodi da je putem Javnog poziva koji se svakodnevno emitirao u programu Radio Rame, uputila svim političkim subjektima na mogućnost gostovanja u programu Radio Rame, iz čega je vidljivo da nitko nije imao povlašten položaj, pa ni aktualni načelnik. Kao dokaz da nitko nije imao povlašten položaj u odnosu prema drugom subjektu, prilažemo Vam poziv od 19.10.2020. godine koji je bio upućen svim političkim subjektima, koji se nalazi na portalu Radio Rame. Isto tako prilažemo u prilogu audio snimak upućen svim političkim subjektima za oglašavanje. U jednom od pitanja, voditelj jasno naglašava da se ne radi o izbornoj kampanji. Jasan poziv za sučeljavanje upućen je kandidatima za načelnika, emisija se emitirala 13. studenog 2020. godine."

Interna komisija Agencije sastala se 11.12.2020. godine i raspravljala o ovom slučaju, o čemu je sačinjen zapisnik.

Izborni zakon BiH u poglavlju 16. *Mediji u izbornoj kampanji* propisuje za medije određene obaveze u vezi sa praćenjem aktivnosti političkih subjekata u toku izborne kampanje, između ostalog i obavezu da ravnopravno i fer predstavljaju političke subjekte i informišu javnost u vezi sa aktivnostima političkih subjekata tokom izborne kampanje, pri čemu je posebno naglašeno da nijedan politički subjekt, ali isto tako nijedan zvaničnik na bilo kojem nivou vlasti, ne može imati povlašten položaj u odnosu na druge učesnike u izbornom procesu. S tim u vezi, relevantnim odredbama Poglavlja 16. posebno su uzete u obzir emisije u programima elektronskih medija koje tematski nisu u direktnoj vezi sa izbornim aktivnostima političkih subjekata, ali koje bi mogle imati uticaj na raspoloženje birača, kao i informisanje o redovnim aktivnostima zvaničnika na svim nivoima vlasti koji su istovremeno kandidati na izborima. U tom smislu jasno je propisano da je takvo informisanje dozvoljeno pod određenim uslovima, odnosno isključivo u dijelu aktivnosti koje proizilaze iz zakonom utvrđenog djelokruga funkcije koju izabrani zvaničnik obavlja, ali bez spominjanja njegove kandidature na izborima i stranačke pripadnosti.

U konkretnom slučaju, Radio Rama ugostila je aktuelnog načelnika Općine Prozor-Rama, g-dina Jozu Ivančevićа, koji je na početku emitovanog programa tako i predstavljen, te u navedenom svojstvu u nastavku govorio o Nacrtu budžeta Općine, sredstvima za budžet, načinima na koje su ista osigurana, problemima u vezi s tim koje je načelnik uspješno savladavao, projektima koji su budžetom planirani, načelnikovim postignućima u vezi sa nekolicinom projekata namijenjenih različitim kategorijama stanovništva, itd, što nije sporno sa aspekta poštivanja primjenjivih odredbi Izbornog zakona BiH. Međutim, kako je analizom utvrđeno, u 18. minuti emisije voditelj usmjerava razgovor na aktuelnu izbornu kampanju, ističući da se g-din Ivančević ponovo kandidirao za funkciju načelnika, nakon čega gost naglašava da je *kandidiran za novi mandat zajedno sa listom HDZ 1990 Općinskog vijeća*, te nastavlja govoriti o projektima i planovima koji su pred njim, nakon čega naglašava kako *vjeruje da*

ćemo biti zajedno i u narednom mandatu, a važno je reći da projekte planiramo zajedno sa cijelim timom, pa i sa vijećnicima Općinskog vijeća, tako da će za njihovu uspješnost biti potrebna potpora što većeg broja vijećnika. Tako ako budemo evo u ovom mandatu dobili što više vijećnika, onda je lakši i rad načelniku i ostvarivanje ovih projekata, ciljeva što smo zacrtali i što ih planiramo završiti. Tačno je da voditelj nakon ove načelnikove izjave kaže da ovo gostovanje nije kampanja, ali odmah nakon te izjave ističe da načelnik Ivančević ima i protukandidata za funkciju načelnika Općine, te mu daje mogućnost za komentar, poziv na sučeljavanje, poruku. Osim što u nastavku razgovora načelnik Ivančević ističe kako zna da ima potporu naroda na izborima, on istovremeno koristi priliku da komentariše protukandidata riječima: „Loše će biti ako protukandidat, ako ga pripremaju za to da se odrekne ovih sredstava koja pripadaju Rami, to će biti najveći problem, drugo me ništa ne zabrinjava...“, te nastavlja obrazlagati važnost sudskih postupaka koji su u toku i važnost poznavanja okolnosti i procedura kojima se isti rješavaju, naglašavajući da je rukovođenje općinom jedan sigurno vrlo ozbiljan i odgovoran posao i njega mogu proći samo ljudi koji tu žive, a ne koji nam dolaze, je li, sa strane... Na kraju emisije načelnik Ivančević se obratio sljedećom porukom: „Vjerujem da naši sugrađani znaju pravilno prosuditi i da će ispravno odlučiti na ovim izborima. I svakako sam optimista, vjerujem u dobar rezultat HDZ 1990 i mene kao načelnika i većeg broja vijećnika sa liste za Općinsko vijeće Prozor-Rama. Mislim da evo to bi bila neka poruka, da se iziđe na izbore u što većem broju i da ljudi dadnu podršku. I meni i Vijeću.“

Dakle, s obzirom na prethodno navedeno, jasno je da je potpuno neutemeljen dio obrazloženja u kojem stanica navodi da je načelnik Ivančević u našem programu gostovao isključivo u ulozi aktualnog načelnika obrazlažući građanima Nacrt proračuna općine Prozor-Rama, budući da je više puta u toku emisije istaknuta njegova kandidatura na izborima, stranačka opcija kojoj pripada, a slušaocima je na kraju emisije upućena i direktna poruka da izađu na izbore i daju mu svoju podršku. Planovi i projekti o kojima je načelnik govorio stavljeni su u službu njegove izborne kampanje, budući da je tokom razgovora naglašeno da realizacija istih zavisi od izbornih rezultata. Agencija ne spori pravo Radija Rama da transparentno informiše svoje slušatelje o trošenju proračunskih sredstava i u vrijeme izborne kampanje, ali Izborni zakon BiH je u tom smislu jasan i ne dozvoljava promovisanje i isticanje aktuelne kandidature pod okriljem i u svjetlu aktivnosti koje proizilaze iz zakonom utvrđenog djelokruga načelničke funkcije koju g-din Ivančević trenutno obavlja, jer na taj način svoj trenutni položaj koristi u svrhu izborne promocije, što ga čini povlaštenim u odnosu na druge učesnike izbornog procesa. Dio izjašnjenja u kojem Radio Rama obrazlaže da je svim političkim subjektima uputila poziv za gostovanje i oglašavanje u programu Radija Rama tokom izborne kampanje nije relevantan u konkretnom slučaju. Naime, radi se o programskim segmentima na koje je Radio Rama obavezna prema odredbama Izbornog zakona BiH i koji bi kao takvi trebali biti jednako dostupni svim političkim subjektima, dok s druge strane predmetna emisija spada u programske sadržaje koji nisu u direktnoj vezi sa izbornim procesom, ali bi mogli imati uticaj na raspoloženje birača, naročito imajući u vidu da je emisija u konačnici iskorištena u svrhu političke promocije načelnika Ivančevića u svjetlu aktuelne izborne kandidature, čime je načelnik Ivančević doveden u povlašten položaj u odnosu na protukandidata. Uzimajući u obzir sve prethodno navedeno, Agencija konstatuje da je ovim došlo do kršenja čl. 16.3 i 16.4 Izbornog zakona BiH u okviru Poglavlja 16. Mediji u izornoj kampanji.

Imajući u vidu naprijed navedeno, Interna komisija Agencije koja je radila na ovom predmetu pristupila je raspravi o prijedlogu kazne, a u skladu sa primjenjivim odredbama Pregleda povreda i odgovarajućih kazni koje izriče Agencija (Pregled). U članu 5. Pregleda navedeno je da je svrha kažnjavanja između ostalog, obezbjeđenje poštivanja Zakona i propisa RAK-a, kao i uticaj na počinioca, kao i na ostale, da ubuduće ne čine kršenja. Prilikom razmatranja predmetnog slučaja u obzir su uzeta opšta pravila za određivanje kazne, sadržana u članu 13. Pregleda, a naročito odgovornost kršitelja, pobude iz kojih je kršenje učinjeno, težina povrede i okolnosti pod kojima je kršenje učinjeno. Premda se radi o prvom zabilježenom kršenju navedene odredbe Izbornog zakona BiH od strane Radija Rama, imajući u vidu važnost poštivanja pravila i propisa koji se odnose na period izborne kampanje, kao i činjenicu da

stanica nije preuzela odgovornost za načinjeni propust, Agencija konstatuje da su ispunjeni uslovi za izricanje novčane kazne u skladu sa članom 40. Pregleda, kojim je propisano sljedeće:

Član 40.
(Povrede u izbornom periodu)

Pružalac medijskih usluga koji prekrši primjenjive odredbe Izbornog zakona Bosne i Hercegovine i podzakonskih akata Centralne izborne komisije Bosne i Hercegovine, kaznit će se novčanom kaznom od 1.000,00 KM do 75.000,00 KM.

Kako bi se ostvarila svrha kažnjavanja, na osnovu navedenog je ocijenjeno da je u konkretnom slučaju neophodno izreći novčanu kaznu kao u tački 3. dispozitiva ovog rješenja, što je u okviru raspona određenog članom 40. Pregleda.

Prema članu 277. stav (1) i članu 278. stav (1) Zakona o obligacionim odnosima, dužnik koji zakasni sa ispunjenjem novčane obaveze, pored glavnice, duguje i zateznu kamatu, nezavisno od toga da li je povjerilac pretrpio bilo kakvu štetu zbog dužnikovog kašnjenja.

Interna komisija Agencije je dana 14.12.2020. dostavila zapisnik generalnom direktoru, koji je isti prihvatio.

Uzimajući u obzir naprijed navedeno, riješeno je kao u dispozitivu ovog rješenja.

Uputstvo o pravnom lijeku: Protiv ovog Rješenja može se izjaviti žalba Vijeću agencije u roku od 15 dana od dana dostavljanja istog. U skladu sa članom 47. stav (2) Zakona o komunikacijama, žalba ne odlaže izvršenje. Na žalbu se plaća 10,00 KM administrativne takse po Tar. br. 2. Tarife administrativnih taksi ("Službeni glasnik BiH", br. 16/02, 19/02, 43/04, 8/06, 76/06, 76/07, 3/08, 42/08, 3/10, 98/12, 15/14, 78/14, 32/17, 53/17 i 62/17).

Prilog: Obrazac za uplatu administrativne takse



Generalni direktor

Draško Milinović
Draško Milinović

Dostaviti:

- Javno poduzeće „Radio-Rama” d.o.o. Prozor-Rama – Radio Rama
- Sektor za finansijsko-računovodstvene i opšte poslove
- u spis

Obrazac br. 2

TAKSA - TAR BROJ 2

ZA ŽALBU PROTIV RJEŠENJA I ZAKLJUČKA (kad je dozvoljena posebna žalba)

Upisao je (ime, adresa | telefon) _____

Broj računa pošte / računa za uplate _____

Broj prijava / broj potvrda _____

Druga oznaka: **ADMINISTRATIVNA TAKSA**
(NAZIV/BROJ AKTA/PREDMETA PO KOJEM SE VRSI UPлата)

Prihodac/Podnizatelj: _____

JRI - TREZOR BIH - TAKSE

Mjesto i datum uplate: _____

Potpis i pečat
nalogodavca: _____

Potpis odobrenog lica: _____

KM **10,00** HMO

samo za uplate javnih prihoda

Broj poravnog obveznika: _____ Vrsta uplate: **0**

Vrsta prihoda: **7|2|2|1|0|2**

Poradni period:

Od: _____

Do: _____

Općina: _____ Budžetska organizacija: **0|7|0|4|9|9|9**

Pošt. na broj: **0|0|0|0|0|0|0|0|0|0**

Pečat Banke

BR. 2/01.01.1994. 50000

INSTRUKCIJE ZA UPLATU:

- **UPLATNI RAČUNI:**
 - 3380002210018390 (Unicredit banka d.d. Mostar)
 - 5517902220404858 (Unicredit banka a.d. Banja Luka)
 - 1610000010751394 (Raiffeisen banka d.d. BiH)
 - 1549212013183391 (Intesa Sanpaolo banka d.d. Sarajevo)

- U RUBRIKU **IDENTIFIKACIONI BROJ** PRAVNA LICA UPISUJU IDENTIFIKACIONI TRINAESTOCIFRENI BROJ, A FIZIČKA LICA JMBG;

- U RUBRIKU **OPĆINA** UPISUJE SE ŠIFRA OPĆINE PREBIVALIŠTA-SJEDIŠTA UPPLATIOCA;

- **POREZNI PERIOD** – TREBA ODGOVARATI DATUMU UPLATE;

- **NAKON IZVRŠENE UPLATE 5. PRIMJERAK UPLATNICE SE DOSTAVLJA AGENCIJI.**



Bosna i Hercegovina
Regulatorna agencija za komunikacije
Bosnia and Herzegovina
Communications Regulatory Agency

Босна и Херцеговина
Регулаторна агенција за комуникације



568

R RE36347 203 5 BA
71104 Sarajevo



Spisak prijema 18. 12. 2020.

POŠTARINA PLAĆENA
KOD POŠTE
71104 SARAJEVO



RADIO RANA
ul. KRALJA TOMISLAVA 6b
88 440 PROZOR-RANA